

# Nagina distracziun – main accidents

Campagna da prevenziun promova la chapientscha dals manischnunz

■ **La fin d'october è la campagna da prevenziun surregionala «Nagina distracziun, main accidents» ida a fin. La campagna ha sensibilisà las participantas ed ils participants dal traffic per il fatg che distracziun en il traffic sin via po chaschunar grevs accidents.** Ch'igl è necessari da sensibilisar per quai mussan las controllas prioritarias ch'èn vegnidas fatgas en il Grischun. La polizia chantunala dal Grischun ha dà multas u ha denunzià entaifer 15 dis stgars 200 manischnunzas e manischnunz.

Tut las activitads al guvernagl che

pon influenzer l'attenziun da las participantas e dals participants dal traffic èn privlusas. Da quai fan part tranter auter telefonar u manipular apparats da navigaziun u players dad MP3. Da quest fatg èsi vegnì tegnì quint cun ils motivs da la campagna. Chavazzins sco «snack», «make-up», «handy», «navi», «player dad MP3» cumbinads cun in signal da privel duain mussar che tschertas activitads pon distrair. La campagna n'ha betg mo appellà a las manischnunzas ed als manischnunz da vehichels a motor, mabain er a partici-

pantas e participants dal traffic sco ciclistas e ciclists u pedunas e peduns. La campagna è vegnida lantschada la fin da settember en 19 chantuns. A la campagna èn sa participads la polizia chantunala da Turitg, las polizias municipalas da Turitg e da Winterthur, las polizias communalas dal chantun Turitg sco er ils corps da polizia dals concordats da la Svizra orientala, centrala e nord-occidentala. Schebain che la campagna è ussa finida uffizialmain vegn la polizia chantunala dal Grischun a far vinavant controllas areguard la distracziun.



Controllas da la polizia sco mesira da prevenziun. LQ